

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা  
কর্তৃপক্ষ কর্তৃক প্রকাশিত

সোমবার, সেপ্টেম্বর ১০, ২০১৮

বাংলাদেশ জাতীয় সংসদ

ঢাকা, ২৬ ভাদ্র, ১৪২৫ মোতাবেক ১০ সেপ্টেম্বর, ২০১৮

নিম্নলিখিত বিলটি ২৬ ভাদ্র, ১৪২৫ মোতাবেক ১০ সেপ্টেম্বর, ২০১৮ তারিখে জাতীয় সংসদে  
উত্থাপিত হইয়াছে :—

বা. জা. স. বিল নং ৩৫/২০১৮

জাতীয় অর্থনীতি শক্তিশালীকরণের উদ্দেশ্যে কৃষক, উৎপাদক, কৃষি ব্যবসায়ী ও  
ভোক্তা সহায়ক কৃষি বিপণন ব্যবস্থার উন্নয়ন ও সম্প্রসারণের লক্ষ্যে বিধান  
প্রণয়নকল্পে আনীত বিল

যেহেতু জাতীয় অর্থনীতি শক্তিশালীকরণের উদ্দেশ্যে কৃষক, উৎপাদক, কৃষি ব্যবসায়ী ও ভোক্তা  
সহায়ক কৃষি বিপণন ব্যবস্থার উন্নয়ন ও সম্প্রসারণের লক্ষ্যে বিধান প্রণয়ন করা সমীচীন ও  
প্রয়োজনীয়;

সেহেতু এতদ্বারা নিম্নরূপ আইন করা হইল :—

প্রথম অধ্যায়  
প্রারম্ভিক

১। সংক্ষিপ্ত শিরোনাম ও প্রবর্তন।—(১) এই আইন কৃষি বিপণন আইন, ২০১৮ নামে  
অভিহিত হইবে।

(২) ইহা অবিলম্বে কার্যকর হইবে।

( ১১২২১ )  
মূল্য : টাকা ১৬.০০

২। সংজ্ঞা।—বিষয় বা প্রসঙ্গের পরিপন্থি কোন কিছু না থাকিলে, এই আইনে—

- (১) “কর্মচারী” অর্থ কৃষি বিপণন অধিদপ্তরের কর্মচারী;
- (২) “কুল চেম্বার” অর্থ কৃষিপণ্য সাময়িকভাবে শীতল অবস্থায় সংরক্ষণ করিবার স্থান বা স্থাপনা;
- (৩) “কৃষি উপকরণ” অর্থ তপশিল-২ এ বর্ণিত কৃষি উপকরণ;
- (৪) “কৃষিপণ্য” অর্থ তপশিল-১ এ বর্ণিত কৃষিপণ্য এবং প্রক্রিয়াজাত কৃষিপণ্য;
- (৫) “কৃষি বিপণন” অর্থ কৃষিপণ্য ও কৃষি উপকরণ উৎপাদক পর্যায় হইতে ভোক্তার নিকট পৌঁছানো পর্যন্ত পরিবহণ, সংরক্ষণ, শ্রেণীকরণ, প্রমিতীকরণ, প্রক্রিয়াজাতকরণ এবং ক্রয়-বিক্রয় সংক্রান্ত কার্যাবলি;
- (৬) “কৃষি বিপণন অধিদপ্তর” অর্থ কৃষি মন্ত্রণালয়ের অধীন কৃষি বিপণন অধিদপ্তর;
- (৭) “কৃষি ব্যবসায়ী” অর্থ ধারা ৭ এর অধীন লাইসেন্সপ্রাপ্ত ব্যক্তি;
- (৮) “কৃষিভিত্তিক শিল্প উদ্যোক্তা” অর্থ কৃষিপণ্য ভিত্তিক শিল্প প্রতিষ্ঠান পরিচালনাকারী ব্যক্তি বা প্রতিষ্ঠান;
- (৯) “গুদাম” অর্থ কৃষিপণ্য ও কৃষি উপকরণ সংরক্ষণের জন্য কোনো দালান, স্থাপনা বা স্থাপনার অংশ;
- (১০) “তপশিল” অর্থ এই আইনের কোনো তপশিল;
- (১১) “প্রজ্ঞাপিত বাজার” অর্থ ধারা ৫ এর অধীন ঘোষিত বাজার;
- (১২) “প্রজ্ঞাপিত শস্য” অর্থ ধারা ১৫ এর অধীন ঘোষিত শস্য;
- (১৩) “প্রবিধান” অর্থ এই আইনের অধীন প্রণীত প্রবিধান;
- (১৪) “ফৌজদারি কার্যবিধি” অর্থ Code of Criminal Procedure, 1898 (Act No. V of 1898);
- (১৫) “বাজার” অর্থ Sate Acquisition and Tenancy Act, 1950 এর section 2(12) এর বিধান অনুযায়ী হাট-বাজার; এবং কৃষিপণ্য, কৃষি উপকরণ ও প্রক্রিয়াজাতকৃত কৃষিপণ্য ক্রয়-বিক্রয় হয় এইরূপ স্থান, সুপারশপ, শপ বা ওয়েব বেইজড শপও উহার অন্তর্ভুক্ত হইবে;

- (১৬) “বাজারকারবারি” অর্থ কৃষিপণ্য এবং কৃষি উপকরণের ক্রয়-বিক্রয়ে মধ্যস্থতাকারী অথবা এতদসংক্রান্ত সেবা প্রদানকারী পাইকারি বিক্রেতা, আড়তদার, মজুদদার, কমিশন এজেন্ট বা ব্রোকার, ওজনদার, নমুনা সংগ্রহকারী, ফড়িয়া বা বেপারী;
- (১৭) “বিধি” অর্থ এই আইনের অধীন প্রণীত বিধি;
- (১৮) “ব্যক্তি” অর্থে যে কোনো ব্যক্তি, প্রতিষ্ঠান, সংস্থা, উহা নিবন্ধিত হউক বা না হউক, বাজারকারবারি, গুদাম মালিক, হিমাগার মালিক এবং কৃষি ব্যবসায়ীকে বুঝাইবে;
- (১৯) “ভোক্তা” অর্থ এইরূপ কোনো ব্যক্তি যিনি পুনঃবিক্রয় ও বাণিজ্যিক উদ্দেশ্যে ব্যতীত সম্পূর্ণ বা আংশিক মূল্য পরিশোধে বা মূল্য পরিশোধের প্রতিশ্রুতিতে বা প্রলম্বিত মূল্য পরিশোধের প্রতিশ্রুতিতে বা কিস্তি ব্যবস্থায় কোনো কৃষিপণ্য, কৃষি উপকরণ বা সেবা ক্রয় ও ব্যবহার করেন;
- (২০) “মজুদ” বা “গুদামজাতকরণ” অর্থ নির্দিষ্ট সময়ের জন্য নিজস্ব বা ভাড়া করা গুদাম বা হিমাগারে কৃষিপণ্য বা কৃষি উপকরণ সংরক্ষণ;
- (২১) “মজুদকারী” অর্থ যিনি কৃষিপণ্য গুদাম বা হিমাগারে মজুদ করিয়াছেন অথবা গুদাম বা হিমাগার মালিক বরাবর হস্তান্তর করিয়াছেন এবং গুদাম বা হিমাগার মালিক কর্তৃক উক্ত পণ্যের বিপরীতে প্রাপ্তিস্বীকারপত্র বহনকারী বা মজুদকারী কর্তৃক আইনানুগভাবে নিযুক্ত ও স্থলাভিষিক্ত যে কোনো ব্যক্তি;
- (২২) “মহাপরিচালক” অর্থ কৃষি বিপণন অধিদপ্তরের মহাপরিচালক;
- (২৩) “মার্কেট চার্জ” অর্থ কোনো প্রজ্ঞাপিত বাজারে কৃষিপণ্যের ক্রয়-বিক্রয় বা ক্রয়-বিক্রয়ের মধ্যস্থতা অথবা এইরূপ ক্রয়-বিক্রয়ের সহিত আনুষঙ্গিক অন্যান্য কার্য তথা ওজন, পরিমাপ, নমুনা সংগ্রহ প্রভৃতি সেবা প্রদানের বিনিময়ে ক্রেতা বা বিক্রেতা কর্তৃক বাজারকারবারিকে প্রদত্ত ধারা ১৬ এর অধীন সরকার কর্তৃক নির্ধারিত কমিশন বা ফি;
- (২৪) “লাইসেন্স” অর্থ এই আইনের অধীন প্রদত্ত লাইসেন্স;
- (২৫) “সরবরাহকারী” অর্থ কৃষি উপকরণ বা কৃষিপণ্যের সরবরাহকারী কোনো ব্যক্তি বা প্রতিষ্ঠান;
- (২৬) “সুপার শপ” অর্থ বৃহদাকারের খুচরা বিক্রয় কেন্দ্র, যেখানে কৃষিপণ্যসহ অন্যান্য বহুবিধ পণ্য ক্রয়-বিক্রয় হয়;

(২৭) “হিমাগার” অর্থ কৃষিপণ্য অপেক্ষাকৃত দীর্ঘসময় যান্ত্রিক উপায়ে কৃত্রিমভাবে শীতল অবস্থায় সংরক্ষণ করিবার স্থান বা স্থাপনা।

৩। আইনের প্রাধান্য।—আপাতত বলবৎ অন্য কোনো আইনে যাহা কিছুই থাকুক না কেন, এই আইনের বিধানাবলি প্রাধান্য পাইবে।

৪। কৃষি বিপণন অধিদপ্তরের কার্যাবলি।—এই আইনের উদ্দেশ্য পূরণকল্পে, কৃষি বিপণন অধিদপ্তরের কার্যাবলি হইবে নিম্নরূপ, যথা:—

- (ক) কৃষি বিপণন তথ্য ব্যবস্থাপনা;
- (খ) কৃষিপণ্যের মূল্য নীতি প্রণয়ন ও বাস্তবায়ন;
- (গ) কৃষি বিপণন ও কৃষি ব্যবসা উন্নয়নের ক্ষেত্রে কার্যকর পদক্ষেপ গ্রহণ;
- (ঘ) কৃষক ও কৃষিপণ্যের বাজার সংযোগ সৃষ্টি ও সুষ্ঠু সরবরাহের প্রয়োজনীয় সহায়তা প্রদান;
- (ঙ) কৃষিপণ্য উৎপাদন এবং বিপণন ও ব্যবসা সম্পর্কিত অর্থনৈতিক গবেষণা পরিচালনা;
- (চ) কৃষিপণ্য উৎপাদন ও ব্যবসায় নিয়োজিত কৃষক, কৃষি ব্যবসায়ী, প্রক্রিয়াজাতকারী, রপ্তানিকারক ও ব্যবসায়ী সমিতিসমূহের সহিত নিবিড় সংযোগ স্থাপনের মাধ্যমে কৃষিপণ্যের আধুনিক বিপণন ব্যবস্থা সম্প্রসারণ;
- (ছ) সুষ্ঠু বিপণনের স্বার্থে কৃষিপণ্য উৎপাদন এলাকায় বাজার অবকাঠামো, গুদাম, হিমাগার, কুলচেম্বার, ইত্যাদি নির্মাণ ও ব্যবস্থাপনা জোরদারকরণ;
- (জ) কৃষিপণ্য ও কৃষি উপকরণের মজুদ বা গুদামজাতকরণ, পণ্যের গুণগতমান, মেয়াদ, মোড়কীকরণ ও সঠিক ওজনে ত্রয়-বিক্রয় সংক্রান্ত কার্যক্রম পরিবীক্ষণ;
- (ঝ) কৃষিপণ্যের সর্বনিম্ন মূল্য ও যৌক্তিক মূল্য নির্ধারণ ও বাস্তবায়ন;
- (ঞ) কৃষিপণ্যের মূল্য সংযোজন ও প্রক্রিয়াজাতকরণ কার্যক্রমে সহায়তা প্রদান;
- (ট) কৃষিপণ্যের মূল্য সহায়তা প্রদান;
- (ঠ) কৃষিপণ্যের অভ্যন্তরীণ ও রপ্তানী বাজার সম্প্রসারণ;

- (ড) কৃষিভিত্তিক শিল্প ও ব্যবসার উন্নয়ন, উৎসাহ প্রদান, প্রসার এবং চুক্তিভিত্তিক বিপণন ব্যবস্থার কার্যপদ্ধতি উন্নয়নে প্রয়োজনীয় পদক্ষেপ গ্রহণ;
- (ঢ) বাজারকারবারি অথবা কৃষি ব্যবসায়ী সংগঠন, সমিতি, সংস্থা, কৃষিভিত্তিক সংগঠন ও সমবায় সমিতিসমূহকে, বিধি দ্বারা নির্ধারিত পদ্ধতিতে, তালিকাভুক্তকরণ এবং, প্রয়োজনে, জাতীয় এবং জেলা পর্যায়ে কৃষিভিত্তিক সংগঠনসমূহের ফেডারেশন অথবা কনসোর্টিয়াম গঠন;
- (ণ) বিক্রয়ের উদ্দেশ্যে সুপার শপে সংরক্ষিত কৃষিপণ্যের গুণগতমান, নির্ধারিত মূল্য ও বিপণন কার্যক্রম পরিদর্শন, পরিবীক্ষণ ও সংশ্লিষ্ট ব্যক্তিকে পরামর্শ প্রদান;
- (ত) কৃষিপণ্য ও কৃষি উপকরণের বিপণন কার্যক্রম সংক্রান্ত মান সংরক্ষণ, পরিদর্শন ও পরিবীক্ষণ; এবং
- (থ) সরকার কর্তৃক অর্পিত অন্যান্য দায়িত্ব পালন।

### দ্বিতীয় অধ্যায়

#### প্রজ্ঞাপিত বাজার ঘোষণা, লাইসেন্স, ব্যবস্থাপনা, ইত্যাদি

৫। প্রজ্ঞাপিত বাজার।—(১) সরকার, সরকারি গেজেটে প্রজ্ঞাপন দ্বারা, প্রজ্ঞাপনে উল্লিখিত তারিখ হইতে, কৃষিপণ্য ও কৃষি উপকরণ ক্রয়-বিক্রয়ের জন্য যে কোনো বাজারকে প্রজ্ঞাপিত বাজার হিসাবে ঘোষণা করিতে পারিবে।

(২) কোনো ব্যক্তি লাইসেন্স গ্রহণ ব্যতিত প্রজ্ঞাপিত বাজারে বাজারকারবারী হিসাবে কার্য পরিচালনা করিতে পারিবেন না।

(৩) উপ-ধারা (২) এর অধীন লাইসেন্সের জন্য বিধি দ্বারা নির্ধারিত পদ্ধতি, ফরম ও ফি প্রদান সাপেক্ষে, মহাপরিচালকের নিকট আবেদন করিতে হইবে।

(৪) উপ-ধারা (৩) এর অধীন আবেদন প্রাপ্তির পর, মহাপরিচালক বা তদকর্তৃক ক্ষমতাপ্রাপ্ত কর্মচারী, বিধি দ্বারা নির্ধারিত পদ্ধতি ও শর্তে, কোনো নির্দিষ্ট প্রজ্ঞাপিত বাজারে বাজারকারবারি হিসাবে কার্য পরিচালনার জন্য লাইসেন্স প্রদান করিতে পারিবেন।

(৫) প্রজ্ঞাপিত বাজার বিধি দ্বারা নির্ধারিত পদ্ধতিতে নিয়ন্ত্রিত ও পরিচালিত হইবে।

৬। গুদাম ও হিমাগারের লাইসেন্স।—(১) কোনো ব্যক্তি এই আইনের অধীন লাইসেন্স গ্রহণ ব্যতিত ব্যবসায়িক উদ্দেশ্যে গুদাম বা হিমাগার পরিচালনা করিতে পারিবেন না।

(২) কোনো ব্যক্তি গুদাম বা হিমাগার পরিচালনা করিতে চাহিলে বিধি দ্বারা নির্ধারিত পদ্ধতি, ফরম ও ফি প্রদান সাপেক্ষে, মহাপরিচালকের নিকট লাইসেন্সের জন্য আবেদন করিতে হইবে।

(৩) উপ-ধারা (২) এর অধীন আবেদন প্রাপ্তির পর, মহাপরিচালক বা তদকর্তৃক ক্ষমতাপ্রাপ্ত কর্মচারী, যাচাই-বাছাইক্রমে সন্তুষ্ট হইলে, বিধি দ্বারা নির্ধারিত পদ্ধতি ও শর্তে, গুদাম বা হিমাগার পরিচালনার জন্য লাইসেন্স প্রদান করিতে পারিবেন।

৭। রপ্তানিকারক, আমদানিকারক, ইত্যাদি কর্তৃক লাইসেন্স গ্রহণ।—(১) কৃষিপণ্য ও কৃষি উপকরণের রপ্তানিকারক, আমদানিকারক, ডিলার, মিলার, সরবরাহকারী, প্রক্রিয়াজাতকারী এবং চুক্তিবদ্ধ চাষ ব্যবস্থার সহিত সম্পৃক্ত ব্যক্তিকে কার্য পরিচালনার জন্য লাইসেন্স গ্রহণ করিতে হইবে।

(২) উপ-ধারা (১) এর অধীন লাইসেন্সের জন্য বিধি দ্বারা নির্ধারিত পদ্ধতি, ফরম ও ফি প্রদান সাপেক্ষে, মহাপরিচালকের নিকট আবেদন করিতে হইবে।

(৩) উপ-ধারা (২) এর অধীন আবেদন প্রাপ্তির পর, মহাপরিচালক বা তদকর্তৃক ক্ষমতাপ্রাপ্ত কর্মচারী, বিধি দ্বারা নির্ধারিত পদ্ধতি ও শর্তে, লাইসেন্স প্রদান করিতে পারিবেন।

ব্যাখ্যা।—এই ধারার উদ্দেশ্য পূরণকল্পে “মিলার” ও “প্রক্রিয়াজাতকারী” বলিতে এইরূপ ব্যক্তিকে বুঝাইবে যাহার অধীন অন্যান্য ১০(দশ) জন শ্রমিক নিয়োজিত রহিয়াছে।

৮। লাইসেন্সের মেয়াদ, নবায়ন ও ফি।—এই আইনের বিধানাবলি সাপেক্ষে, লাইসেন্সের মেয়াদ, নবায়ন ও ফি বিধি দ্বারা নির্ধারিত হইবে।

৯। লাইসেন্স হস্তান্তর নিষিদ্ধ।—কোনো ব্যক্তি তাহার লাইসেন্স অন্য কোনো ব্যক্তির নিকট হস্তান্তর করিতে পারিবেন না।

১০। লাইসেন্স স্থগিত ও বাতিলকরণ।—কোনো ব্যক্তি লাইসেন্সের শর্ত ভঙ্গ করিলে, মহাপরিচালক বা তদকর্তৃক ক্ষমতাপ্রাপ্ত কর্মচারী, বিধি দ্বারা নির্ধারিত পদ্ধতিতে লাইসেন্স স্থগিত বা বাতিল করিতে পারিবেন।

১১। মজুদকৃত পণ্যের সংরক্ষণ ও ব্যবস্থাপনা।—প্রত্যেক গুদাম বা হিমাগারে মজুদকৃত কৃষিপণ্যের সংরক্ষণ ও ব্যবস্থাপনা বিধি দ্বারা নির্ধারিত পদ্ধতিতে নিয়ন্ত্রিত ও পরিচালিত হইবে।

১২। আপৎকালীন পণ্য সরবরাহ।—জরুরি অবস্থা বা সংকট মোকাবেলার জন্য সরকারের চাহিদা ও নির্দেশনা অনুযায়ী গুদাম বা হিমাগার মালিক এবং মজুদকারী গুদাম অথবা হিমাগারে মজুদকৃত পণ্য সরবরাহ করিতে বাধ্য থাকিবেন।

১৩। পরিদর্শনকালে লাইসেন্স প্রদর্শন।—(১) মহাপরিচালক বা তদকর্তৃক ক্ষমতাপ্রাপ্ত কর্মচারী, কোনো গুদাম বা হিমাগারের লাইসেন্স, যন্ত্রপাতি, সরঞ্জাম, মজুদকৃত কৃষিপণ্য, হিসাব বহি ও নথিপত্র পরিদর্শন ও পরীক্ষা করিতে পারিবেন।

(২) জেলা বা উপজেলা কৃষি বিপণন সমন্বয় কমিটির কোনো সদস্য বা মহাপরিচালক বা তদকর্তৃক ক্ষমতাপ্রাপ্ত কোনো কর্মচারী বাজার, প্রজ্ঞাপিত বাজার, গুদাম বা হিমাগার পরিদর্শন করিতে পারিবে এবং পরিদর্শনকালে প্রত্যেক বাজারকারবারি, কৃষি ব্যবসায়ী, গুদাম বা হিমাগার মালিক লাইসেন্স প্রদর্শন করিতে বাধ্য থাকিবেন।

### তৃতীয় অধ্যায় কমিটি গঠন ও উহার কার্যাবলি

১৪। কমিটি।—এই আইনের উদ্দেশ্য পূরণকল্পে, সরকার, ‘জাতীয় কৃষিবিপণন সমন্বয় কমিটি’, ‘জেলা কৃষি বিপণন সমন্বয় কমিটি’, ‘উপজেলা কৃষি বিপণন সমন্বয় কমিটি’ এবং ‘বাজারভিত্তিক ব্যবস্থাপনা কমিটি’ গঠন করিতে পারিবে।

(২) উপ-ধারা (১) এ উল্লিখিত কমিটির গঠন এবং কার্যাবলি বিধি দ্বারা নির্ধারিত হইবে।

### চতুর্থ অধ্যায় প্রজ্ঞাপিত শস্য, মার্কেট চার্জ, ইত্যাদি

১৫। প্রজ্ঞাপিত শস্য ঘোষণা।—(১) জরুরি অবস্থা বা সংকট মোকাবেলার জন্য সরকার, সরকারি গেজেটে প্রজ্ঞাপন দ্বারা, প্রজ্ঞাপনে উল্লিখিত সময়ের জন্য, এক বা একাধিক কৃষিপণ্য সমগ্র দেশ বা নির্দিষ্ট এলাকার জন্য প্রজ্ঞাপিত শস্য হিসাবে ঘোষণা করিতে পারিবে।

(২) সরকার, প্রয়োজনে, উপ-ধারা (১) এর অধীন প্রজ্ঞাপিত শস্যসমূহের এলাকাভিত্তিক এবং নির্দিষ্টকৃত সময়ের জন্য মূল্য নির্ধারণ করিতে পারিবে।

১৬। মার্কেট চার্জ ও ভাড়া নির্ধারণ।—সরকার, মহাপরিচালকের সহিত পরামর্শক্রমে, সরকারি গেজেটে প্রজ্ঞাপন দ্বারা,—

(ক) প্রজ্ঞাপিত বাজারের জন্য মার্কেট চার্জ নির্ধারণ করিতে পারিবে;

(খ) কৃষিপণ্য ও কৃষি উপকরণ মজুদ অথবা গুদামজাতকরণের জন্য গুদাম অথবা হিমাগার মালিক কর্তৃক মজুদকারীর নিকট হইতে আদায়যোগ্য ভাড়ার হার নির্ধারণ করিতে পারিবে।

১৭। বাজার তথ্য।—মহাপরিচালক বা তদকর্তৃক ক্ষমতাপ্রাপ্ত কর্মচারী, জেলা অথবা উপজেলা কৃষি বিপণন সমন্বয় কমিটির কোনো সদস্য কোনো বাজারকারবারি, কৃষি ব্যবসায়ী, গুদাম বা হিমাগার মালিক, সুপার শপ ও কৃষিভিত্তিক শিল্প উদ্যোক্তার নিকট বাজার তথ্যসহ অন্যান্য তথ্য চাহিতে পারিবেন এবং তাহারা উহা সরবরাহ করিতে বাধ্য থাকিবেন।

১৮। অন্যান্য কর্তৃপক্ষের সহায়তা গ্রহণ।—মহাপরিচালক, প্রয়োজনে, এই আইনের অধীন কোনো ক্ষমতা প্রয়োগ বা কার্য সম্পাদনের উদ্দেশ্যে আইন প্রয়োগকারী সংস্থা বা অন্য কোনো সরকারি বা সংবিধিবদ্ধ কর্তৃপক্ষের সহায়তা গ্রহণ করিতে পারিবেন।

**পঞ্চম অধ্যায়**  
**অপরাধ ও দণ্ড**

১৯। অপরাধ ও দণ্ড।—(১) কোনো ব্যক্তি—

- (ক) ধারা ৫, ৬ ও ৭ এর অধীন লাইসেন্স গ্রহণ ব্যতীত কার্য পরিচালনা করিলে;
- (খ) লাইসেন্স হস্তান্তর করিলে;
- (গ) ধারা ১৬ এ নির্ধারিত মার্কেট চার্জ বা ভাড়ার অতিরিক্ত আদায় করিলে;
- (ঘ) কৃষি বিপণন অধিদপ্তর বা উহার কোনো কর্মচারীকে এই আইনের অধীন কার্য সম্পাদনে বাধা প্রদান করিলে বা চাহিত তথ্য প্রদান না করিলে;
- (ঙ) তাহার মালিকানাধীন কৃষি উপকরণ ও কৃষিপণ্যের পাইকারি ও খুচরা বিক্রয় মূল্য প্রকাশ্য স্থানে বা পণ্যের মোড়কে বা দৃষ্টিগোচর হয় এমনভাবে প্রদর্শন না করিলে;
- (চ) কৃষিপণ্যের মোড়কে পণ্যের পুষ্টিমান ও উপাদানের শতকরা হার, উৎপাদন ও মেয়াদ-উত্তীর্ণের তারিখ এবং সর্বোচ্চ খুচরা মূল্য উল্লেখ না করিলে বা মেয়াদ-উত্তীর্ণের পর উহা বিক্রয় করিলে বা বিক্রয়ের উদ্দেশ্যে সংরক্ষণ করিলে;
- (ছ) জনস্বাস্থ্যের জন্য ক্ষতিকর কোনো রাসায়নিক বা অন্য কোনো দ্রব্য কৃষিপণ্যে ব্যবহার করিলে;
- (জ) কৃষিপণ্য ও কৃষি উপকরণ বিক্রয়কালে ওজনে কম প্রদান করিলে;
- (ঝ) ধারা ১২ এর বিধান লঙ্ঘন করিলে;
- (ঞ) ক্রয়কৃত পণ্যের মূল রশিদ দোকান বা ব্যবসা প্রতিষ্ঠানে সংরক্ষণ না করিলে;
- (ট) সরকার কর্তৃক ইজারাকৃত বা অনুমোদিত হাট বাজারে কৃষিপণ্য পাইকারি বা খুচরা হিসাবে ক্রয় বিক্রয়ে বাধা প্রদান করিলে;
- (ঠ) কৃষি উপকরণ ও কৃষিপণ্যের সরবরাহে বাধা সৃষ্টি অথবা যে কোনোভাবে বাজারে কৃত্রিম সংকট সৃষ্টি করিলে বা বাজারে চাহিদা থাকা সত্ত্বেও তাহার গুদাম বা হিমাগার হইতে খুচরা বিক্রয় বা ভোক্তার নিকট বিক্রয় করিতে অস্বীকার করিলে;
- (ড) কৃষিপণ্য, কৃষি উপকরণ ও নিত্য প্রয়োজনীয় পণ্যের কৃত্রিম সংকট সৃষ্টি করিলে বা সরকার কর্তৃক নির্ধারিত হারের অধিক মুনাফা গ্রহণ করিলে;

উহা এই আইনের অধীন অপরাধ বলিয়া গণ্য হইবে এবং তজ্জন্য তিনি অনধিক ১ (এক) বৎসর কারাদণ্ড বা অনধিক ১ (এক) লক্ষ টাকা অর্থদণ্ড অথবা উভয় দণ্ডে দণ্ডনীয় হইবেন।

(২) কোনো ব্যক্তি এই আইনের অধীন কোনো অপরাধের জন্য দণ্ডিত হইবার পর পুনরায় একই অপরাধ সংঘটন করিলে তিনি উক্ত অপরাধের জন্য নির্ধারিত দণ্ডের দ্বিগুণ দণ্ডে দণ্ডনীয় হইবেন।



## ষষ্ঠ অধ্যায়

## অপরাধ বিচারার্থ গ্রহণ, বিচার, আপিল, ইত্যাদি

২০। প্রতিষ্ঠান কর্তৃক অপরাধ সংঘটন।—কোনো প্রতিষ্ঠান কর্তৃক এই আইনের অধীন কোনো অপরাধ সংঘটিত হইলে, উক্ত অপরাধের সহিত প্রত্যক্ষ সংশ্লিষ্টতা রহিয়াছে প্রতিষ্ঠানের এমন প্রত্যেক পরিচালক, অংশীদার, প্রধান নির্বাহী, ম্যানেজার, সচিব বা অন্য কোনো কর্মকর্তা বা কর্মচারী বা প্রতিনিধি উক্ত অপরাধ সংঘটন করিয়াছেন বলিয়া গণ্য হইবে, যদি না তিনি প্রমাণ করিতে পারেন যে, উক্ত অপরাধ তাহার অজ্ঞাতসারে সংঘটিত হইয়াছে অথবা উক্ত অপরাধ রোধ করিবার জন্য তিনি যথাসাধ্য চেষ্টা করিয়াছেন।

ব্যাখ্যা।—এই ধারায়—

- (ক) “প্রতিষ্ঠান” বলিতে কোনো কোম্পানি, সংবিধিবদ্ধ সংস্থা, বাণিজ্যিক প্রতিষ্ঠান, অংশীদারি কারবার, সমিতি বা একাধিক ব্যক্তি সমন্বয়ে গঠিত সংগঠনকে বুঝাইবে; এবং
- (খ) বাণিজ্যিক প্রতিষ্ঠানের ক্ষেত্রে “পরিচালক” বলিতে উহার কোনো অংশীদার বা পরিচালনা বোর্ডের সদস্যকেও বুঝাইবে।

২১। অপরাধ বিচারার্থ গ্রহণ।—মহাপরিচালক বা তদকর্তৃক ক্ষমতাপ্রাপ্ত কোনো কর্মচারীর লিখিত অভিযোগ ব্যতিত কোনো আদালত এই আইনের অধীন কোনো মামলা বিচারার্থ গ্রহণ করিবে না।

২২। অপরাধের আমলযোগ্যতা ও জামিনযোগ্যতা।—এই আইনের অধীন অপরাধসমূহ অ-আমলযোগ্য (Non-cognizable) এবং জামিনযোগ্য (Bailable) হইবে।

২৩। তদন্ত, বিচারের পদ্ধতি, ইত্যাদি।—এই আইনের অধীন সংঘটিত অপরাধের তদন্ত, বিচার, আপিল এবং সংশ্লিষ্ট অন্যান্য বিষয়ে ফৌজদারি কার্যবিধির বিধানাবলি প্রযোজ্য হইবে।

২৪। ম্যাজিস্ট্রেট কর্তৃক অপরাধ বিচার।—এই আইনের অধীন অপরাধসমূহ প্রথম শ্রেণির জুডিসিয়াল ম্যাজিস্ট্রেট বা মেট্রোপলিটন ম্যাজিস্ট্রেট কর্তৃক বিচার্য হইবে।

২৫। দণ্ড আরোপের ক্ষেত্রে ম্যাজিস্ট্রেটের বিশেষ ক্ষমতা।—ফৌজদারি কার্যবিধিতে যাহা কিছুই থাকুক না কেন, কোনো প্রথম শ্রেণির জুডিসিয়াল ম্যাজিস্ট্রেট বা মেট্রোপলিটন ম্যাজিস্ট্রেট এই আইনের অধীন দণ্ড আরোপ করিতে পারিবে।

২৬। মোবাইল কোর্টের এখতিয়ার।—এই আইনে ভিন্নরূপ যাহা কিছুই থাকুক না কেন, মোবাইল কোর্ট আইন, ২০০৯ (২০০৯ সনের ৫৯ নং আইন) এর উদ্দেশ্য পূরণকল্পে, এই আইনের অধীন সংঘটিত অপরাধের ক্ষেত্রে, উক্ত আইনের তপশিলভুক্ত হওয়া সাপেক্ষে, ধারা ২১ এর বিধান অনুসরণক্রমে, মোবাইল কোর্ট দণ্ড আরোপ করিতে পারিবে।

## সপ্তম অধ্যায়

## বিবিধ

২৭। বিরোধ মীমাংসা।—(১) মহাপরিচালক বা তদকর্তৃক ক্ষমতাপ্রাপ্ত কর্মচারী বাজারকারবারি, কৃষি ব্যবসায়ী, কৃষক, ক্রেতা ও বিক্রেতা, গুদাম ও হিমাগার মালিক, মজুদকারী, পণ্য পরিমাপক, চুক্তিবদ্ধ চাষব্যবস্থার পক্ষগণ বা অন্য কোনো পক্ষের মধ্যে সৃষ্ট বিরোধ সংশ্লিষ্ট ব্যক্তির আবেদনের প্রেক্ষিতে মীমাংসা করিতে পারিবেন।

(২) উপ-ধারা (১) এর অধীন বিরোধ মীমাংসার ক্ষেত্রে মহাপরিচালক বা তদকর্তৃক ক্ষমতাপ্রাপ্ত কর্মচারী কর্তৃক প্রদত্ত সিদ্ধান্ত দ্বারা কোনো পক্ষ সংক্ষুব্ধ হইলে তিনি, উক্ত সিদ্ধান্ত প্রদানের ৭ (সাত) দিনের মধ্যে—

- (ক) মহাপরিচালক কর্তৃক ক্ষমতাপ্রাপ্ত কর্মচারীর সিদ্ধান্তের বিরুদ্ধে মহাপরিচালকের নিকট; এবং
- (খ) মহাপরিচালকের সিদ্ধান্তের বিরুদ্ধে সরকারের নিকট আপিল করিতে পারিবেন এবং আপিল কর্তৃপক্ষের সিদ্ধান্ত চূড়ান্ত বলিয়া গণ্য হইবে।

২৮। বিধি প্রণয়নের ক্ষমতা।—এই আইনের উদ্দেশ্য পূরণকল্পে, সরকার, সরকারি গেজেটে প্রজ্ঞাপন দ্বারা, বিধি প্রণয়ন করিতে পারিবে।

২৯। প্রবিধান প্রণয়নের ক্ষমতা।—এই আইনের উদ্দেশ্য পূরণকল্পে, মহাপরিচালক, সরকারের পূর্বানুমোদনক্রমে, সরকারি গেজেটে প্রজ্ঞাপন দ্বারা, এই আইন বা বিধির সহিত অসামঞ্জস্যপূর্ণ নহে এইরূপ প্রবিধান প্রণয়ন করিতে পারিবে।

৩০। তপশিল সংশোধন।—সরকার, সরকারি গেজেটে প্রজ্ঞাপন দ্বারা, তপশিল সংশোধন করিতে পারিবে।

৩১। রহিতকরণ ও হেফাজত।—(১) Agricultural Produce Markets Regulation Act, 1964 (East Pakistan Act No. IX of 1964) এবং Warehouses Ordinance, 1959 (East Pakistan Ordinance No. LXVI of 1959), অতঃপর যথাক্রমে উক্ত Act ও Ordinance বলিয়া উল্লিখিত, এতদ্বারা রহিত করা হইল।

(২) উপ-ধারা (১) এর অধীন রহিতকরণ সত্ত্বেও, উক্ত Act ও Ordinance এর অধীন—

- (ক) কৃত কোনো কাজ বা গৃহীত কোনো ব্যবস্থা বা প্রদত্ত লাইসেন্স বা চলমান কোনো কার্য এই আইনের অধীন কৃত, গৃহীত, প্রদত্ত বা চলমান বলিয়া গণ্য হইবে;

- (খ) প্রণীত কোনো বিধিমালা, এই আইনের বিধানাবলির সহিত সামঞ্জস্যপূর্ণ হওয়া সাপেক্ষে, এই আইনের অধীন প্রণীত বলিয়া গণ্য হইবে; এবং
- (গ) দায়েরকৃত কোনো মামলা অনিষ্পন্ন থাকিলে উহা এমনভাবে নিষ্পন্ন করিতে হইবে যেন উক্ত Act ও Ordinance রহিত হয় নাই।

৩২। ইংরেজিতে অনূদিত পাঠ প্রকাশ।—(১) এই আইন কার্যকর হইবার পর সরকার, সরকারি গেজেটে প্রজ্ঞাপন দ্বারা, এই আইনের মূল বাংলা পাঠের ইংরেজিতে অনূদিত একটি নির্ভরযোগ্য পাঠ (Authentic English Test) প্রকাশ করিবে।

(২) বাংলা পাঠ ও ইংরেজি পাঠের মধ্যে বিরোধের ক্ষেত্রে বাংলা পাঠ প্রাধান্য পাইবে।

## তপশিল-১

## [ ধারা ২ (৪) দ্রষ্টব্য ]

- (ক) খাদ্যশস্য : ১. ধান, ২. চাউল, ৩. গম, ৪. আলু, ৫. ভুট্টা, ৬. কাউন, ৭. চিনা, ৮. যব;
- (খ) অর্থকরী ফসল : ১. পাট, ২. চা, ৩. তুলা, ৪. তামাক;
- (গ) ডাল ও কলাই: সকল প্রকার ডাল ও কলাই (খোসাসহ ও খোসা ব্যতীত);
- (ঘ) তেলবীজ ও তেল : ১. রাই এবং সরিষা, ২. তিল, ৩. তিষি, ৪. বাদাম, ৫. নারিকেল, ৬. রেড়ি বীজ, ৭. সূর্যমুখী, ৮. সয়াবিনসহ সকল প্রকার ভোজ্য তেল;
- (ঙ) ইক্ষু এবং গুড় : ১. ইক্ষু, ২. সকল প্রকার গুড়;
- (চ) ফল : সকল প্রকার তাজা ও শুকনা ফল;
- (ছ) ফুল : সকল প্রকার তাজা ও শুকনা ফুল, ক্যাকটাস, পাতাবাহার;
- (জ) শাক-সবজি : সকল প্রকার শাক-সবজি;
- (ঝ) পশু ও পশুজাত পণ্য : ১. গরু ও গরুর মাংস, ২. মহিষ ও মহিষের মাংস, ৩. উট ও উটের মাংস, ৪. ছাগল ও ছাগলের মাংস, ৫. ভেড়া ও ভেড়ার মাংস, ৬. হাঁস-মুরগি, কোয়েল ও কবুতরের মাংস, ৭. ডিম, ৮. দুগ্ধ ও অন্যান্য দুগ্ধজাত দ্রব্য, ৯. পশম, ১০. কাঁচা ও আধা প্রক্রিয়াজাত চামড়া, ১১. হাড় এবং হাড়ের গুড়া;
- (ঞ) মাছ : ১. সকল প্রকার মাছ (তাজা, শুকনা, লবণজাত ও হিমায়িত), ২. চিংড়ি, ৩. কাঁকড়া, ৪. কচ্ছপ, ৫. কুমির ও অন্যান্য জলজ উদ্ভিদ ও প্রাণী;
- (ট) মশলা : ১. পেঁয়াজ, ২. হলুদ, ৩. আদা, ৪. রসুন, ৫. জিরা ও কালজিরা, ৬. ধনিয়া, ৭. মরিচ (কাঁচা ও শুকনা), ৮. গোল মরিচ, ৯. অন্যান্য সকল প্রকার মশলা;
- (ঠ) অন্যান্য কৃষিজাত পণ্য : ১. সুপারি, ২. পান, ৩. চেরাই কাঠ, ৪. জ্বালানি কাঠ, ৫. বাঁশ, ৬. লবণ, ৭. চিনি, ৮. খৈল, ৯. পাটজাত পণ্য, ১০. নারিকেল ছোবড়া ও ছোবড়াজাত পণ্য, ১১. তেতুল ও তেতুলবীজ, ১২. সকল প্রকার ভুসি, ১৩. গোলপাতা, ১৪. বেত, ১৫. কাঠের ফার্নিচার, ১৬. মধু, ১৭. ডাব ও নারিকেল, ১৮. মোম;
- (ড) প্রক্রিয়াজাত কৃষিপণ্য : ১. চিড়া, ২. মুড়ি, ৩. সুজি, ৪. সেমাই, ৫. আটা, ৬. ময়দা, ৭. সকল প্রকার কৃষিপণ্যের রস ও জুস, ৮. আচার, ৯. বেসন, ১০. চিপস, ১১. অন্য যে কোনো প্রক্রিয়াজাত কৃষিপণ্য।

তপশিল-২

[ ধারা ২ (৩) দ্রষ্টব্য ]

(ক) বীজ : সকল প্রকার বীজ;

(খ) সার : সকল প্রকার রাসায়নিক, জৈব ও মিশ্র সার;

(গ) বালাইনাশক : সকল প্রকার বালাইনাশক ও প্রাকৃতিক ও জৈব বালাইনাশক;

(ঘ) বাচ্চা : রেনু, পোনা, ব্যবসার উদ্দেশ্যে পালিত পশুপাখির বাচ্চা, মুরগির বাচ্চা, গরুর বাচ্চা, ছাগলের বাচ্চা, ভেড়ার বাচ্চা, কোয়েলের বাচ্চা;

(ঙ) খাদ্য জাতীয় উপকরণ : সকল প্রকার খাদ্য জাতীয় উপকরণ যাহা হাঁস-মুরগি, গবাদি পশু ও মৎস্য উৎপাদনে প্রয়োজন হয়। হাঁস-মুরগি, গবাদি পশু ও মৎস্য উৎপাদনে ব্যবহৃত সকল প্রকার খাদ্য জাতীয় উপকরণ; এবং

(চ) কৃষিকার্যে ও কৃষি প্রক্রিয়াজাতকরণে ব্যবহৃত মেশিনারিজ অথবা যন্ত্রপাতি : কৃষিকার্যে ব্যবহৃত সকল প্রকার যন্ত্রপাতি।

### উদ্দেশ্য ও কারণ সম্বলিত বিবৃতি

ক) দেশে উৎপাদিত কৃষিজাতপণ্য গুদামজাতকরণ সংক্রান্ত ব্যবস্থাপনার জন্য ১৯৫৯ সালে The Warehouses Ordinance, 1959 (East Pakistan Ordinance No. LXVI of 1959) এবং কৃষিপণ্যের ক্রয়-বিক্রয় ও বাজারসমূহ নিয়ন্ত্রণের উদ্দেশ্যে ১৯৬৪ সালে The Agricultural Produce Markets Regulation Act, 1964 (East Pakistan Act No. IX of 1964) প্রণয়ন করা হয়। পরবর্তীতে ১৯৮৫ সালে The Agricultural Produce Markets Regulation (Amendment) Ordinance, 1985 (Ordinance No. XIX of 1985) প্রণয়ন করা হয়। বাজার ব্যবস্থাপনার জন্য বর্ণিত আইনসমূহ ইংরেজি ভাষায় প্রণীত। বৃটিশ ও পাকিস্তান আমলে ইংরেজি ভাষায় প্রণীত আইনসমূহ প্রয়োজনীয় পরিবর্তন ও সংশোধনক্রমে বাংলা ভাষায় প্রণয়নের প্রয়োজনীয় পদক্ষেপ গ্রহণের জন্য গত ০২ নভেম্বর ২০১৫ তারিখে মন্ত্রিসভা বৈঠকে সিদ্ধান্ত গৃহীত হয়। উক্ত সিদ্ধান্তের পরিপ্রেক্ষিতে বর্ণিত ইংরেজি আইনসমূহ পরিবর্তন ও সংশোধনক্রমে বাংলা ভাষায় একটি নতুন আইন প্রণয়নের উদ্যোগ গ্রহণ করা হয়।

খ) The Warehouses Ordinance, 1959 এবং The Agricultural Produce Markets Regulation Act, 1964 প্রণয়নের পর দীর্ঘ সময় অতিবাহিত হয়েছে। ইতোমধ্যে মুক্তবাজার অর্থনীতির প্রভাবে বাজার ব্যবস্থাপনার ব্যাপক পরিবর্তনের পরিপ্রেক্ষিতে কৃষকের উৎপাদিত ফসল ও অন্যান্য কৃষিপণ্যের উপযুক্ত মূল্য প্রাপ্তি নিশ্চিতকরণ, ভোক্তার জন্য সহনীয় মূল্য স্থিতিশীল রাখা, কৃষি উপকরণ ও কৃষিপণ্যের চাহিদা নিরূপণ, অভ্যন্তরীণ উৎপাদন, চাহিদা ও বাজার মূল্যের প্রক্ষেপণ, আমদানি ও রপ্তানির সম্ভাব্যতা বিশ্লেষণ, অভ্যন্তরীণ ও আন্তর্জাতিক বাজারের গতি প্রকৃতি পর্যবেক্ষণ ও বিশ্লেষণ, চুক্তিভিত্তিক উৎপাদন ও বিপণন এবং গ্রুপভিত্তিক বিপণন ব্যবস্থার প্রচলন, বাজারভিত্তিক ব্যবস্থাপনা কমিটি গঠন, খাদ্যপণ্যের ভেজাল এবং কীটনাশক ও কেমিক্যালের অবাধ ব্যবহার রোধ, ইত্যাদি ক্ষেত্রে উপযুক্ত কার্যক্রম গ্রহণের প্রয়োজনীয়তা রয়েছে। কিন্তু এ কার্যক্রমসমূহ পরিচালনার জন্য পর্যাপ্ত আইনগত কর্তৃত্ব ও ক্ষমতা বিদ্যমান আইনসমূহে অন্তর্ভুক্ত নেই। সে লক্ষ্যে বিদ্যমান অধ্যাদেশ ও আইন দু'টি সংশোধন, পরিমার্জন ও সমন্বয়যোগী করে বাংলা ভাষায় 'কৃষি বিপণন আইন ২০১৮' প্রণয়ন করা হয়েছে।

গ) কৃষকের উৎপাদিত কৃষিপণ্যের উপযুক্ত মূল্য প্রাপ্তি নিশ্চিতকরণের পাশাপাশি কৃষিপণ্যের সুষ্ঠু বাজার ব্যবস্থাপনার সম্প্রসারণ, কৃষি ব্যবসার উন্নয়ন, কৃষিপণ্য উৎপাদন ও বিপণন কার্যক্রম পরিচালনার ক্ষেত্রে গতিশীলতা আনয়নের লক্ষ্যে এবং দেশের কৃষিজ অর্থনীতি শক্তিশালীকরণের উদ্দেশ্যে The Warehouses Ordinance, 1959 এবং The Agricultural Produce Markets Regulation Act, 1964 অধ্যাদেশ ও আইন দু'টি রহিত করে বাংলা ভাষায় 'কৃষি বিপণন আইন, ২০১৮' প্রণয়ন করা হয়েছে।

ঘ) বর্ণিত উদ্দেশ্য ও কারণে 'কৃষি বিপণন আইন, ২০১৮' শীর্ষক বিল মহান জাতীয় সংসদের বিবেচনার জন্য প্রণয়ন করা হয়েছে।

মতিয়া চৌধুরী  
ভারপ্রাপ্ত মন্ত্রী।

ড. মোঃ আবদুর রব হাওলাদার  
সিনিয়র সচিব।